

МЕСЯЦА МАРТА В 31-Й ДЕНЬ.

СВЯТИТЕЛЯ ИННОКЕНТИЯ, АПОСТОЛА СИБИРИ И АМЕРИКИ

НА ВЕЛИЦЕЙ ВЕЧЕРНИ

На Господи, воззвах: стихиры на 8, глас 1.

Подобен: О, дивное чудо:

О, преславное чудо: * новоявленный апостол Сибири и Америки является нам * и молитвенник теплый к Богу – Иннокентий пречудный нам бывает; * веселися, обитель преподобного Сергия, * имущи в себе мощи святителя, * възграйте, православных множества, * предивного Иннокентия имуще в бедах заступника и вопиюще к нему: * радуйся, светильниче Российския земли, * Господеви молися * даровати душам нашим мир и велию милость.

О, дивное чудо: * се бо воистинну в Российскойстей стране * православия столп непоколебимый – * равноапостольный Иннокентий является нам, * темже, Богомудрых собори, * на высоту духом возноситеся, святителю вопиюще: * радуйся, апостоле наш, * Господеви молися * даровати душам нашим мир и велию милость.

Дивны Твоя тайны, Христе Боже, * яко даровал еси нам новаго светильника веры и благочестия, * возсиявшаго на небеси церковнем * в лице святых, Богу угодивших, * апостола Сибири и Америки, * святителя Иннокентия, к немуже возопиим: * святче Божий, Господеви молися * даровати душам нашим мир и велию милость.

Данесь ликуют собори верных * в память твою, святителю Иннокентие, * и велегласно вопиют: * ты, любве ради Христовы страну свою оставив, * вселился еси на морских островех, * да просветиши светом Евангелия неведущия Христа, * идеже апостольски потрудился еси, * языческая племена крестив, * доброделанию их научил, * человеческия обычаи украсил еси, вопиющих ти: * радуйся, просветителю наш, * Господеви молися * даровати душам нашим мир и велию милость.

Твое славят усение иерархов собори, * иноков лица и вся языцы, тобою просвещеннии, * радуются земнороднии о твоей славе и воспевают: * святителю Христов Иннокентие, * Господеви молися * даровати душам нашим мир и велию милость.

Глас 2:

Киими похвальными венцы * венчаем святителя, * предстоящаго на Небеси Богу, * не оставляющаго же нас духом, * священнопроповедника Богомудра, нравов * апостольских подражателя, * сей бо воистинну есть достоин безсмертныя славы, * егоже венчает на Небеси Христос Бог наш, * имей велию милость.

Киими песненными добротами * восхвалим Иннокентия святителя, * хвалу воспевшаго посреде рода неверных * и Богопознанием многия вразумившаго, * грешныя от заблуждений отвратившаго * и Ангелом многу радость сотворившаго, * сей воистинну достоин есть уста Божия нарецися, * прием венец на Небеси от Христа Бога нашего, * имущаго велию милость.

Киими песньми духовными * похвалим святителя Иннокентия, * града Иркутска прозябение, * всея Сибири удобрение, * Америки просветителя * и всея России украшение, * новаго чудотворца, безмезднаго врача, * егоже прославляет Христос Бог наш, * имей велию милость.

Слава, глас 6:

Святителя великаго Иннокентия, * во иерарсех изряднаго, * в ликостоянии святых славнаго, * в чудотворцех чуднаго, * архиерея святаго, * сошедшеся в память его, о празднолюбцы, * песненными похвалами ублажим, глаголюще: * радуйся, праведне, егоже душа в руце Божии, * во свете пренебеснем; * радуйся, проповедниче, просветивый и научивый языческая племена; * радуйся, блаженне, чистый сердцем, ясно ныне Бога зряй; * радуйся, святой, всех святых Богу Святейшему благоугодивый; * радуйся, добрый рабе Господень, * вшедый в радость Господа своего, * Емуже ныне молися * о чтущих всечестную память твою.

И ныне, Богородичен, глас тойже:

Кто Тебе не ублажит, Пресвятая Дево? * кто ли не воспоет Твоего Пречистаго Рождества? * Безлетно бо от Отца возсиявый Сын Единородный, * Тойже от Тебе, Чистыя, пройде, * неизреченно воплощя: * естеством Бог Сый * и естеством быв Человек нас ради; * не во двою лицу разделяемый, * но во двою естеству * неслитно познаваемый. * Того моли, Чистая Всеблаженная, * помиловатися душам нашим.

Вход. Прокимен дне. И чтения.

Притчей чтение (главы 10, 3 и 8):

Память праведнаго с похвалами, и благословение Господне на главе его. Блажен человек, иже обрете премудрость, и смертен, иже уведет разум. Лучше бо сию куповати, нежели злата и сребра сокровища. Честнейшая же есть камней многоценных, все же честное недостойно ея есть. Долгота бо дней и лета живота в деснице ея, в шуйце же ея богатство и слава. От уст ея исходит правда, закон же и милость на языке носит. Послушайте убо мене, о чада, честная бо реку, и блажен человек, иже пути моя сохранит: исходи бо мои – исходи живота, и уготовляется хотение от Господа. Сего ради молю вас и предлагаю мой глас сыновом человеческим, яко аз, премудрость, устрой совет и разум, и смысл аз призвах. Мой совет и утверждение, мой разум, моя же крепость. Аз мене любящия люблю, ищущии же мене обрящут благодать. Разумейте убо, незлобивии, коварство, ненаказанныи же, прилагайте сердца. Послушайте мене и паки, честная бо реку, и отверзу от устен правая, яко истине поучится гортань мой, мерзки же предо мною устны лживыя. С правдою вси глаголы уст моих: ничтоже в них стропотно, ниже развращенно. Вся права суть разумевающим и проста обретающим разум. Научаю бо вас истине, да будет о Господе надежда ваша, и исполнитесь Духа.

Премудрости Соломоновы чтение (глава 10):

Уста праведнаго каплют премудрость, устне же мужей мудрых ведут благодать. Уста мудрых поучатся премудрости, правда же избавляет от смерти. Скончавшуся мужу праведну не погибнет надежда, сын бо праведен раждается в живот и во благих своих плод правды обьмет. Свет праведным всегда и от Господа обрящут благодать и славу. Язык мудрых добрая свесь, и в сердце их почиет мудрость. Любит Господь преподобная сердца, приятни же ему вси непорочнии в пути. Мудрость Господня просвещает лице разумнаго. Постигает бо желающия ю, прежде даже, разумети ю, и удобь узрится от любящих ю. Утреневавый к ней не утрудится, и бдяй ея ради вскоре без печали будет. Яко достойных ея сама обходит ищущи, и во стезях ея является им благоприемне. Мудрости никогдаже одолеет злоба. Сих ради и рачитель бых доброты ея и возлюбих ю, и поисках от юности моя. И взысках невесту привести

себе, яко всех Владыка возлюби ю. Таибница бо есть Божия хитрости и обретательница дел его. Труды ея суть добродетели, целомудрию же и разуму та учит, правде и мужеству, ихже потребнее ничтоже есть в житии человеком. Аще же и многого искусства желает кто, весть древняя и быти хотящая рассмотрит. Свесть извития словес и разрешения гаданий, знамения и чудеса проразумеет и сбытия времен и лет, и всем советник есть благ, яко безсмертие есть в ней и благославие во общении словес ея. Сего ради беседовах ко Господу и помолихся Ему, и рех от всего сердца моего: Боже отцев и Господи милости, сотворивый вся словом Твоим и мудрости Твоею устройый человека, да владеет бывшими от Тебе тварми, и да управляет мир в преподобии и правде. Дажь ми Твоих престолов приседящую премудрость и не отлучи мене от отрок Твоих, яко аз раб Твой и сын Рабыни Твоея. Посли ю с Небес от святого жилища Твоего и от Престола славы Твоея, да сущи со мною научит мя, что благоугодно есть пред Тобою. И наставит мя в разум и сохранит мя в славе своей. Помышления бо смертных вся боязлива и погрешительна умышления их.

Премудрости Соломоновы чтение (глава 4):

Похваляему праведнику возвеселятся людие, безсмертие бо есть память его, яко от Господа познавается и от человек, и угодна Господеви душа его. Возлюбите убо, о мужие, мудрость и поживете, восхощите ея и наказани будете, начало бо ея любви и соблюдение закона. Почтите премудрость, да во веки царствуете. Возвещу вам и не скрью от вас таин Божиих: яко Той мудрости Наставник есть и мудрых Исправитель, и всякому смыслу и делу Хитрец. И всем смыслом научит мудрость, есть бо в ней дух разумен и свят и сияние света присносущнаго и образ благодати Божия. Та други Божия и пророки устрояет, благолепнейши же есть солнца и паче всякаго сотворения звезд, свету сосуждаема, обретается первейши. Та угождающих ей от болезней избави и настави на стези правыя, даде им разум имети свят и сохрани я от ловящих и подвиг крепок подаде им. Да разумеют вси, яко сильнейши всего есть благочестие и никогдаже преможет злоба мудрости, ниже преидет злыя обличающы суд. Рекоша же в себе, помысливше неправедно: насильствуем праведному и не пощадим преподобства его, ни усрамимся седин старости многолетны. Будет бо нам крепость закон и уловим праведнаго, яко неугоден нам есть и противится делом нашим и поносит нам отпадение закона и обличает нам согрешения наказания нашего. Возвещает нам разум имети Божий и отрока Господня себе именует. Бысть нам на обличение помышлением нашим, и тяжек нам есть и видимь, яко неподобно иным житие его и изменены стези его, в поругание вменихомся ему и удаляется от путей наших, яко от нечистот, и блажит последняя праведных. Увидим убо, аще словеса его истинна суть, искусим яже сбываются ему. Руганием и мукою истяжем его, да разумеем кротость его и искусим беззлобство его, смертию безобразною осудим его, будет бо посещение от словес его. Сия помыслиша и прельстишася, ослепи бо я злоба их и не разумеша таин Божиих, и не разсудиша, яко Ты еси Бог Един, живота имей и смерти власть, и спасаяй во время скорби, и избавляяй от всякаго зла. Щедр и Милостив и дая преподобным Своим благодать, и Своєю мышцею гордым противляяся.

На литии стихира, глас 8:

Приидите, православных собори, * принесите ныне пение и моление своему просветителю, * той бо начаток бысть проповеди Божественныя, * еюже многия

привед ко Христу, * Емуже, аще и на Небесех предстоит, * обаче и земная посещает * и ныне с нами спразднует и возвеселяет собранныя люди своя, * зрит покланяющияся святому образу его * и слышит молитвы молящихся, вопиющих к нему: * святителю отче Иннокентие, * буди с нами, и никтоже на ны.

Слава, и ныне, глас тойже:

Твои раби, Владычице, * в Церкви Твоей верою предстояще, * Твоя ожидаем милости: * посети наше смирение, * святым Твоим покровом защити нас от всякаго зла, * буди с нами, и никтоже на ны.

На стиховне стихиры, глас 5.

Подобен: Радуйся:

Радуйся, иерарше Христов, * великий угодниче Божий, * служителю, Божественных таин достойный, * чистый и честный сосуде Святаго Духа, * носивый Бога в сердце твоём выну, * во устех же благодать изливающуюся имевый, * пастырю добрый, * учителю премудрый, * наставниче изрядный, * кормчий корабля церковнаго искусный, * правителю чудный, * путеводителю известный, * святителю отче Иннокентие, * моли Христа Бога спастися душам нашим.

Стих: Уста моя возглаголют премудрость * и поучение сердца моего разум.

Радуйся, священная главо, * доброто престола архиерейска, * иерархов похвало, веселие людей верных, * радование печальных, * целебниче больных, * помощниче беспомощным, * источниче неоскудный к тебе прибегающим, * имже почерпаем от Христа Бога велию милость.

Стих: Священницы Твои облекутся в правду, * и преподобнии Твои возрадуются.

Радуйтесь, православных собори, * прославляюще память святителя Иннокентия, * апостольски в Сибири и Америке потрудившагося, * тьму нечестия отгнавшаго, * свет же веры в родех возсиявшаго, * защитника и заступника, * стеною молитв своих крепче верных ограждающаго, * Богу о нас предстательствующаго и молящагося, * да приемлем велию милость.

Слава, глас 2:

Святителю Богомудре Иннокентие! * Ты раб благий и верный у Господа был еси, * не сокрыв в земле данный тебе от Него талант, * но, уча и творя, умножил еси его, * темже, в мале верен быв, * над многим поставлен еси от Небеснаго Домовладыки, * Егоже моли о чтущих с верою память твою.

И ныне, Богородичен, глас тойже:

Все упование мое на Тя возлагаю, * Мати Божия, * сохрани мя под кровом Твоим.

Тропарь, глас 1:

Во вся страны полунощныя изыде вещание твое, * яко приемшия слово твое, * ихже боголепно научил еси, * неведущия Христа светом Евангелия просветил еси, * человеческия обычаи украсил еси, * Российская похвало, святителю отче наш Иннокентие, * моли Христа Бога * спастися душам нашим.

Ин тропарь, глас 3:

Первый учитель прежде темным языческим племенам, * первый возвеститель им пути спасительнаго, * апостольски потрудивыйся в просвещении Сибири и Америки, * святителю отче наш Иннокентие, * Владыку всех моли * мир вселенней даровати * и душам нашим велию милость.

И ныне, Богородичен.

НА УТРЕНИ

По 1-м стихословии, седален, глас 3:

Новый светильник Церкви Христовой явился еси, святителю Иннокентие, * и молитвенник теплый, * яко и по смерти неотступно Духом нас посещаеши. * Темже и припадаем к тебе, святой апостоле наш, * моли о нас, любовию память твою почитающих, * да избавимся от всех зол молитвами твоими.

Слава, и ныне, Богородичен:

Богородованная Владычице, * святителем удобрение, праведным утверждение и преподобным всем похвало, * спаси ны от бед, и скорбей, и лютых прегрешений * предстательством и молитвами Твоими.

По 2-м стихословии, седален, глас 8:

Премудрости сокровище быв, святителю Иннокентие, * сердца неверных людей учением твоим просветил еси, * благочестия семена насадив, * темже Тя вси, яко учителя премудра, ублажаем и молим: * молися Христу, Емуже от юности поработал еси, * избавити нас от навет вражних и спастися душам нашим.

Слава, и ныне, Богородичен:

Молитву прими от нас, в кров Твой, Пречистая Дево, прибегающих, * не престай молящи Человеколюбца спастися рабом Твоим.

По полиелеи седален, глас 4:

От юности добродетели прилежав, * сосуд Духа Святаго, святителю Иннокентие, был еси, * от Негоже и премудрости навык, * научил еси человеки Христу веровати. * Егоже моли спасти всех, любовию тя почитающих.

Слава, и ныне, Богородичен:

Молитвами, Спасе, Пречистыя Твоя Матере и святаго равноапостольнаго Иннокентия * милости Твоя нам низпосли богато * и мир Твой подаждь людем Твоим.

Таже степенна, 1-й антифон 4-го гласа.

Прокимен, глас 4: Уста моя возглаголют премудрость * и поучение сердца моего разум.

Стих: Услышите сия, вси языцы, внушите, вси, живущии по вселенней.

Евангелие от Иоанна, зачало 35, от полу.

По 50-м псалме стихира, глас 6:

Ты еси пастырь добрый, * взыскавый заблуждшия * и погибшия души обративый, * козлища во овцы претворивый * и во Христову приведый я ограду, * темже днесь, людие твои, в память твою сопедшесе, * единогласно восхваляем тя, глаголюще: * радуйся, святителю Божий Иннокентие, * первый Камчатский, Курильский и Алеутский архиерею; * радуйся, проповедниче веры и образе добрых дел; * радуйся, стране нашей утверждение; * радуйся, учителю, научивый языческая племена поклоняться в Троице Единому Богу – * Отцу, и Сыну, и Святому Духу, * Емуже ныне предстоя со святители и апостолы, * молися о спасении празднующих святыю и всечестною память твою.

Канон святителю, егоже краегранесие: От Господа стопы человеку исправляются. Глас 8.

Песнь 1

Ирмос: Дивному Богу величия принесем, * и великолепно с нами * да воспоеет земля и небо * ясно славу Его.

Отверзем уста похвальная, уясним язык в памяти, вси вернии, новаго Российскаго светильника, апостола Сибири и Америки, святителя Иннокентия, и с ним дивному Богу величия принесем, и воспоем славу Его.

Господню гласу, призвавшему просветити люди, во тьме сеядяция, послушав был еси, страну свою оставив, дальнему и трудному пути вдался еси и, достиг к Алеутским островом, тамо апостольски потрудился еси, величия дивному Богу принося и воспевая славу Его.

Отец и учитель был еси алеутом, светом Евангелия тех просветив, научил еси их плинфоделанию, каменоздательству и иным художеством и с помощию их храм в честь Вознесения Господня воздвигл еси, освятил еси его, да вси приносят в нем величия Богу, дивному во святых, и поют славу Его.

Богородичен: Спасительное еси пристанище и покров призывающих Тя, Богородительнице Пречистая, темже от души призываем Тя тепле: Владычице, спаси ны и научи нас дивному Богу величия приносить и воспевати славу Его.

Песнь 3

Ирмос: Уподобил мя, Христе, умно горе Сионстей, * возвысивый и утвердивый в надежди о Тебе * и искапавый росу благодати, * Человеколюбец.

Подражатель любви Отца Небеснаго, яко сын любви, в любви пребываяй, любовию Христовою возлюбил еси чада твоя, святителю Иннокентие, просвещения их ради в малем кораблеце, волнами морскими обуреваемъ, преплывал еси от острова на остров, проповедуя Христа: многия жители прибрежия Берингова моря крестил еси и молился еси о них, яко да искапает на них росу благодати Своя Человеколюбец.

Остров Ситх апостольскими твоими труды, святителю Иннокентие, хвалится, тамо бо племя колошей просветил еси и храм во имя Архангела Михаила воздвигл еси, в немже и до ныне возносится моление Господу Богу, источившему на них росу благодати Своя.

Добродетельми, яко лучами солнечными, просветил еси неверных в дальних странах, пятнадцать бо лет апостольски трудился еси на Алеутских островах, идеже не точию пастырь и учитель, но и строитель, и врач, и всем вся в нуждах был еси, да вся приобрящещи и приведещи Христу. Темже от святителя Филарета Московскаго пророчески, яко равноапостол, прежде твоего прославления на земли, почтен был еси и от Бога венчан славою на Небеси, Егоже моли, да низпослет и нам росу благодати Своя Человеколюбец.

Богородичен: Архангельскую песнь, еже радуйся, Тебе зовем, Богоневесто, Господь с Тобою, радуйся, Радосте Ангелов и всех человеков, славящих Тя, веселие, спаси души поющих Тя, Богородице Чистая.

Седален, глас 2:

Органе доброголасный, * возгремевый Христово Евангелие людем Сибири и Америки * и тем возвестивый слова Божия смотрение, * ум Горний, * доле жительствуяй и в Небесех Богомыслием пребываяй, * ты, управляя твою паству,

умножил еси церковная чада * усыновив я Небесному Отцу, * и ныне, святителю Иннокентие, молися о нас, * всеблаженную память твою радостно празднующих.

Слава, и ныне, Богородичен:

С верою и любовию притекающих к Тебе * и со страхом поющих Тя * молитвенный глас услыши, Владычице.

Песнь 4

Ирмос: Всел еси на кони, апостолы Твоя, Господи, * и приял еси руками Твоима узды их, * и спасение бысть еждение Твое * верно поющим: * слава силе Твоей, Господи.

Смотрением Божиим Церковь Русская в земли Американстей кафедру святительскую учреждает и тя во епископа Камчатскаго, Курильскаго и Алеутскаго поставляет. Ты же, святителю Иннокентие, воли Господней повинуюся, кормило правления приемлещи, дивному Павлу, апостолу языков, подражая, земли обширныя обтекаещи, просвещенную твою паству научая пети: слава силе Твоей, Господи.

Труды твоими апостольскими просветил ест Господь люди, во тьме и сени смертней седящия, темже, яко добрый пастырь, святителю Иннокентие, указал еси им путь в Царство Небесное, всех научая пети: слава силе Твоей, Господи.

О тебе, просветителе своем, алеуты и колоши возрадовашася и, до днесь внимая учению твоему, приносят в жертву Богу труды рук своих, благодарно любовию почитая тя, научившаго их воспевати едиными усты: слава силе Твоей, Господи.

Богородичен: **П**ылающий страстей пламень в нас угаси, источник слез даруй, Владычице, яко да ими отыдем скверну смиренных душ наших и обрящем милость, во еже пети: слава силе Твоей, Господи.

Песнь 5

Ирмос: Повеления Твоя просвещением, Христе Боже, * яко Благ, показал еси, * зане, Светодавче, * от нощи утренююще, славу возсылаем.

Чистотою жития твоего и неустанными труды твоими в нощи неведения седящия языки Камчатския – коряки, чукчи и тунгусы ко свету Христову обратил еси, святителю Иннокентие, и научил еси их утреневати и славу Богу возсылати.

Елеем любве твоя помазал еси люди, на морских островах сущия, апостольски утверждая Церковь Христову, в вере поклонятися Триединому Богу. Сего ради со апостолы радуешися, приемля почесть благовестника Христова.

Лености и всякаго мирскаго пристрастия в жизни сей уклонился еси, плоть свою трудами и подвигами истнил еси, посещая паству свою в Якутске и Приамурстей стране, идеже храмы Божия создав, град Благовещенск святительскою кафедрою украсил еси и, новыя овцы стада Христова поучая, слово Божие на их языки превел еси: да всяк язык, от нощи утренюя, славу возсылает Богу.

Богородичен: **О** Богородительнице, радости Подательнице, верою славящия Тя и от души поющия Тя радости неизреченныя исполни и Света невечерняго сподоби, Дево Богоблагодатная, Владычице.

Песнь 6

Ирмос: Отверг мя еси * во глубины сердца морскаго, * и видех чудеса Твоя, Господи.

В корабли с тобою плывущии, в пучине бурю потопляеми, море, повинувшееся тебе, видеша и ужасом одержими быша, темже, от бездушнаго научившися, святости твоей поклонишася, святителю Иннокентие, прославляюще чудеса Господня.

Егда волею Божию к берегу Японии пристал еси, святителю Иннокентие, тамо сподвижнику твоему, равноапостольному Николаю, благословение на труды апостольския преподал еси, утвердив в нем ревность Божию просвещати люди японския, сего ради и прославлена еста, яко благовестника Христова.

Кормчий искусный корабля церковнаго, чудно по водам морским преплыл еси и в земле неплодней ралом словес твоих оляденевшая людей сердца возделал еси, Божественное семя в них всеяв, плод красный Христу, святителю Иннокентие, возрастил еси, зывая ко Господу: на островах морских видех чудеса Твоя, Господи.

Богородичен: **У**пование и надежда наша Ты еси, Пресвятая Богородице, спаси страну нашу православную и люди Твоя, молящися и имя Твое призывающия.

Кондак, глас 4:

Истинный и неложный учитель был еси: * заповеданная бо Господем сам сотворив, * имже учил еси и наказал еси ко благочестию приходящая чада, * неверныя вразумлял еси познати веру истинную, * просвещая их святым Крещением. * Сего ради со апостолы радуешися, * приемля почеть благовестника Христова.

Икос: **П**ервый сеятель был еси духовных добродетелей, архиерей и учитель тобою просвещенным в странах Сибири и Америки. Многия языки от неверия в веру Христову привел еси, чистым житием Богу угождати тех наставляя. Сего ради прославляем тя, святителю Иннокентие, яко благовестника Христова.

Песнь 7

Ирмос: **В** начале землю основавый * и Небеса словом утвердивый, * благословен еси во веки, Господи, Боже отец наших.

Иго Христово на рамо взем, последовал еси стопам Его, апостольски в дальней стране потрудился еси, тобою просвещенным чадом слово Божие на якутском языке возвестил еси, да прославляют они Основавшаго землю на водах, поя Господеви: благословен еси во веки, Боже отец наших.

Словесную паству Христову благовонным злагом богоугодно воспитавый и на правый хриstopодражательнаго жития путь боголепно наставивый, вручил еси преемником твоим и, Господу изволившу, стопы твоя в первопрестольный град Москву направил еси, поя Господеви: благословен еси во веки, Боже отец наших.

Пастырски жезл прием, святителю Иннокентие Промыслом Божиим водим был еси, на престол московский пришед, праздник святителей Петра, Алексия, Ионы и Филиппа учредил еси, и, по апостолу, всем вся быв, да всех ко Христу приведеши и купно с ними вопиеши: благословен еси во веки, Господи, Боже отец наших.

Богородичен: **Р**адуйся, престоле Господень огнезrachный; радуйся, заре невественнаго блистания; радуйся, облаче возсиявшаго Солнца Праведнаго — Христа, Спаса нашего, Емуже поем: благословен еси, Господи, Боже отец наших.

Песнь 8

Ирмос: **П**окрываяй водами превыспренняя Своя, * полагаяй морю предел песок * и содержи вся, * Тя поет солнце, Тя хвалит луна, * Тебе приносит песнь вся тварь, * яко Содетелю всех во веки.

Архиерей сый, святителю Иннокентие, архипастырем нашим в молитвах способствуй, да право правят слово истины, Церковь Православную огради, страну нашу сохрани, суетными и страстными помышлениями мятущийся ум наш исцели, разслабленная сердца наша укрепи, веру в нас умножи, да славим Содетеля всех во веки.

Всельшаяся в тя благодать Святаго Духа святителя тя изрядна нам показа, светоносными равноапостольных исправлений зарями Церковь Российскую светло озари, священноначальниче Иннокентие, темже дело Божие на земли совершив, предуготовав же себе Господеви, по приятии Святых Таин Христовых о Бозе почил еси, да со святыми поеши на Небеси: благословен еси, Господи, Боже отец наших, во веки.

Любы николиже отпадает, глаголет Божественный Дух устами первоверховнаго апостола Павла, в чудесех же любви твоя истина сия известися, святителю Иннокентие, яко и по смерти чадом твоим являешися и пети Господеви поучаеши во вся веки.

Богородичен: **Я**же по благодати дарованная от Бога Помощнице нам всем, христианом, Того моли, Всеблагая и Непорочная, яко да презрит наша безчисленная согрешения и избавит пламеннаго томления, и тьмы кромешныя, и муки всякия.

Песнь 9

Ирмос: **Б**лагословен Господь, Бог Израилев, * **в**оздвигнувший рог спасения нам * **в** доме Давидове, отрока Своего, * **в** них же посети нас **В**осток с высоты * **и** направил ны есть на путь мира.

Юже стяжал еси честною Твоею Кровию, Церкви Твоея, Христе, чада утверди и направи на путь мира, тако въздыхал еси к Сыну Божию, святителю отче наш Иннокентие, Царствия Небеснаго еще на земли сын быв.

Течение восприял и путь совершил, землю неплодну молитвами твоими доброплодну показа, о приносящих тебе пение сие, святителю Иннокентие, Христа Бога нашего моли, да принесем покаяния плоды, яко да посетит и нас Восток с высоты и направит стопы наша на путь мира.

Смотрением Божиим и святительским благословением рукою моею приносимое твоим трудом похваление, святителю Иннокентие, не отрини, но прими и моли Христа Бога, да избавит мя шуияго стояния и направит мя на путь мира.

Богородичен: **Я**ко похвалу Ангелов и человек восхваляем Тя вси, Дево Марие, и верно молимся, Всепетая: моление наше прими и прошения исполни.

Светилен.

Подобен: **П**лотию уснув:

Плотию, аще и почил еси, святителю Иннокентие, * **н**о духом жив сый, * **в** Царствии невечернем со Христом царствуеши * **и** молишися Ему о призывающих тя верою и любовию.

Слава, и ныне, Богородичен:

Владычице, Дево Чистая, избави нас лютых всех, * умоляючи на Кресте Пригвоздившаго грехи наша, * **и** сподоби нас одесную Его стати, егда приидет во славе Своей.

На хвалитех стихиры на 4, глас 8.

Подобен: О, преславнаго чудесе:

Благодать духовная в тя вселися от юности, * и научи тя правоверным смыслом сияти, * и блистати добродетелей светлостью, * и озаряти верных исполнение, * демонскую же тьму отгоняти, * темже яко причастника тя невечернему Свету * ублажаем благочестно вси, * досточудне отче наш, святителю Иннокентие.

Благодатию духовною имея душу обогащенну, * стяжал еси чист помысл и сердце бодро, * веру неблазненну и любовь воистинну нелицемерну, * от земли же преставился еси к Небесным, * идеже с лики праведных водворяешися, * темже и чтим тя священными песньми * и благочестно вси славим успение твое, * святителю Иннокентие.

Благодатию духовною алеутская чада просветив, * страсти идольския от душ их отгнал еси * и, Святей Троице поклонятися научив, * селение Той преочищенно соделался еси, * по сих же, в страну свою возвративыйся, * в первопрестольнем граде добре святительствовал еси, * ко Господу же отшед, * во обители Святыя Троицы с преподобным Сергием, * в храме Духа Святаго купно с наставником твоим * богомудрым архиастырем Филаретом почиваеши, * святителю Иннокентие, отче наш.

Ни славы, ниже богатства возжелев, * духовное художество взыскал еси, святителю, * желанием еже многих просветити * и ко Христу привести, * еже и получил еси. * Темже молися ко Господу спасти вся, * честную память твою почитающия.

Слава, глас тойже:

Приидите, вернии, * прославим новоявленного святителя Иннокентия, * яко, на Небеси водворяяся, * с лики Ангельскими, со святители и апостолы ликовствует, * к немуже возопиим: * присный наш заступниче, * теплый о нас к Богу молитвенниче, * сохрани отечество наше от враг видимых и невидимых, * умири мир весь от мятежа страстей человеческих, * отыми от нас всякую злобу, вражду и злословие, * вкорени в сердцах наших мир, любовь и единопутье, * во еже благоугодити нам Господу и Владыце живота нашего, * да спасет души наша.

И ныне, Богородичен, глас тойже:

Владычице, прими молитвы раб Твоих * и избави нас * от всякия нужды и печали.

Славословие великое и отпуст.

НА ЛИТУРГИИ

Блаженны от канона, песни 3-я и 6-я.

Подражатель любви Отца Небеснаго, яко сын любви, в любви пребываяй, любовию Христовою возлюбил еси чада твоя, святителю Иннокентие, просвещения их ради в малем кораблеце, волнами морскими обуреваемъ, преплывал еси от острова на остров, проповедуя Христа: многия жители побережья Берингова моря крестил еси и молился еси о них, яко да искапает на них росу благодати Своя Человеколюбец. [Дважды.]

Остров Ситх апостольскими твоими труды, святителю Иннокентие, хвалится, тамо бо племя колошей просветил еси и храм во имя Архангела Михаила воздвиг еси, в немже и до ныне возносится моление Господу Богу, источившему на них росу благодати Своя.

Добродетельми, яко лучами солнечными, просветил еси неверных в дальних странах, пятнадцать бо лет апостольски трудился еси на Алеутских островах, идеже не точию пастырь и учитель, но и строитель, и врач, и всем вся в нуждах был еси, да вся приобрящещи и приведещи Христу. Темже от святителя Филарета Московскаго пророчески, яко равноапостол, прежде твоего прославления на земли, почтен был еси и от Бога венчан славою на Небеси, Егоже моли, да низпослет и нам росу благодати Своя Человеколюбец.

В корабли с тобою плывущи, в пучине бурею потопляеми, море, повинувшееся тебе, видеша и ужасом одержими быша, темже, от бездушнаго научившееся, святости твоей поклонися, святителю Иннокентие, прославляюще чудеса Господня.

Егда волею Божию к берегу Японии пристал еси, святителю Иннокентие, тамо сподвижнику твоему, равноапостольному Николаю, благословение на труды апостольския преподал еси, утвердив в нем ревность Божию просвещати люди японския, сего ради и прославлена еста, яко благовестника Христова.

Слава: **К**ормчий искусный корабля церковнаго, чудно по водам морским преплыл еси и в земле неплодней ралом словес твоих оляденевшая людей сердца возделал еси, Божественное семя в них всеяв, плод красный Христу, святителю Иннокентие, возрастил еси, зывая ко Господу: на островах морских видех чудеса Твоя, Господи.

И ныне: Богородичен: **У**пование и надежда наша Ты еси, Пресвятая Богородице, спаси страну нашу православную и люди Твоя, молящихся и имя Твое призывающих.

Тропарь, глас 1:

Во вся страны полунощныя изыде вещание твое, * яко приемшия слово твое, * ихже боголепно научил еси, * неведущия Христа светом Евангелия просветил еси, * человеческия обычаи украсил еси, * Российская похвало, святителю отче наш Иннокентие, * моли Христа Бога * спастися душам нашим.

Ин тропарь, глас 3:

Первый учитель прежде темным языческим племенам, * первый возвеститель им пути спасительного, * апостольски потрудившись в просвещении Сибири и Америки, * святителю отче наш Иннокентие, * Владыку всех моли * мир вселенней даровати * и душам нашим велию милость.

Кондак, глас 4:

Истинный и неложный учитель был еси: * заповеданная бо Господем сам сотворив, * имже учил еси и наказал еси ко благочестию приходящая чада, * неверныя вразумляя еси познати веру истинную, * просвещая их святым Крещением. * Сего ради со апостолы радуешися, * приемля почестъ благовестника Христова.

Прокимен, глас 1: Уста моя возглаголют премудрость * и поучение сердца моего разум.

Стих: Услышите сия, вси языцы, * внушите, вси, живущии по вселенней.

Апостол ко Евреем, зачало 318.

Братие, таков нам подобаше Архиерей, преподобен, незлобив, безсквернен, отлучен от грешник и вышше Небес быв. Иже не имать по вся дни нужды, якоже первосвященницы, прежде о своих гресех жертвы приносить, потом же о людских: сие бо сотвори единою, Себе принес. Закон бо человеки поставляет первосвященники, имущия немощь, слово же клятвенное, еже по законе, Сына во веки совершенна. Глава же о глаголемых: такова имамы Первосвященника, иже седе одесную Престола Величества на Небесех, святым служителъ и скинии истинней, иже водрузи Господь, а не человек.

Аллилуя, глас 2: Уста праведнаго поучатся премудрости, и язык его возглаголет суд.

Стих: Закон Бога его в сердце его, и не запнутся стопы его.

Евангелие от Матфея, зачало 11.

Рече Господь Своим учеником: вы есте свет мира, не может град укрытися верху горы стоя. Ниже вжигают светилника и поставляют его под спудом, но на свещнице, и светит всем, иже в храмине суть. Тако да просветится свет ваш пред человеки, яко да видят ваша добрая дела и прославят Отца вашего, Иже на небесех. Да не мните, яко приидох разорити закон, или пророки: не приидох разорити, но исполнити. Аминь бо глаголю вам: дондеже преидет небо и земля, иота едина, или едина черта не преидет от закона, дондеже вся будут. Иже аще разорит едину заповедий сих малых и научит тако человеки, мний наречется в Царствии Небеснем, а иже сотворит и научит, сей велий наречется в Царствии Небеснем.

Причастен: В память вечную будет праведник, от слуха зла не убоится.

Молитва

О пастырю добрый и учителю премудрый, образе благонравия всем, благочестно жити хотящим, святителю отче наш Иннокентие! К тебе, яко чада ко отцу, прибегаем и молимся, поминая твою любовь к людям: буди щит несокрушим Святей Церкви Православной и отечеству нашему, архиереи благолепием

святительства и премудростию украси, пастырем в служении ревность даруй, монашествующия к подвигом добраго течения в послушании утверди, православным христианом веру святую непорочну соблюсти умоли, мир весь предстательством твоим умири. Теплый наш молитвенниче, всероссийский светильниче, просветителю Сибири и Америки, осени Горним благословением нас, в скорбех сущих, и подаждь утешение и избавление от болезней душевных и телесных; испроси нам свыше дух кротости, целомудрия, смиренномудрия, терпения и любви, да прочее время жития нашего в вере и покаянии проживем и в жизни вечней благодарне восхвалим прославльшаго тя Господа – Отца, и Сына, и Святаго Духа, Троицу Единосущную и Нераздельную, ныне, и присно, и во веки веков. Аминь.